

# AWIG-AWIG DESA ADAT APIT YEH



DESA ADAT APIT YEH  
MANGGIS KARANGASEM BALI  
TAHUN 2019

## MURDHA CITTA

Om Awighnamastu Nama Siddham

Malarapan saking panghyangning Ida Sang Hyang Widhi Wasa asung kerta wara nugraha ngawentenang kahuripan sekala niskala, ring Bhuana Agung lan Bhuana Alit. Manut dresta Desane wantah pawakan pasayuban Krama Desa rauhing kula warga pawongannya. Desane keanggehang Bhuana Agung, pawongannya soang-soang pinaka Bhuana Alit.

Sotaning Bhuana Agung, Desane wantah pawakan Bhuwana maurip jangkep saha Tri Hita Karana nya luire:

ha. Parhyangan, sehananing kahyangan, penyiwian Desa genah ngareana Ida Hyang Parama Wisesa maka jiwana Desane.

na. Pawongan, krama saha warga Desa maka sami mepawakan bayu pramana mawanan Desa prasida molah maprawerti.

ca. Palemahan, tanah kakuuban Desa sinanggeh stulaning Desane.

Adung patemon Bhuana kalih, larapan santa-jagatditha, sinanggeh mhurdxaning prayojana pangriptaning awig-awig Desa Adat ring paseban mami Krama Desa Adat.

Pinaka sepat siku-siku pematut, wastu prasida, prayojana mami kabeh prasama angidep muah amagehaken kadi linging awig-awig iki.

## PRALAMBANG DESA ADAT APIT YEH



### ARTOS PRALAMBANG

1. **MERU**  
Punika lambang ngerumaketang lan ngerajegang kahyangan Desa malarapan antuk ngemargiang srada bakti.
2. **CANDI BENTAR**  
Ngerumaketang Desa Adat Apit Yeh melarapan antuk sada rasa sagilik-saguluk selunglung sabayantaka, paras paros sarpanapa, saling asah, asih, asuh.
3. **UNDAG LIMA RING KAWENTENAN MERU**  
Ngemanggehang pami kukuh Panca Srada.
4. **PADI KAPAS**  
Tata tentram kerta raharja, gemah ripah lan ginawi.
5. **TELUNG LEMBAR DAUN TUNJUNG LAN LINGKARAN PAT PAT**  
Tri Hita Karana ngiket pat pat banjar adat sane wenten
6. **EKA CITA KERTANING BHUANA**  
Nyikiang raga melarapan antuk pikayun suci nirmala ngerajegang jagat.
7. **BUCU LIMA**  
Punika lambang Pancasila.

## DAGING AWIG-AWIG

MURDHA CITTA .....	i
PRALAMBANG LAN ARTOS PRALAMBANG DESA ADAT APIT YEII.....	ii
DAGING AWIG-AWIG .....	iii
PRATAMAS SARGGAH : HARAN LAN WAWIDANGAN DESA.....	1
DWITA SARGGAH : PIKUKUH LAN TATUJON .....	1
TRITYAS SARGGAH : SUKERTA TATA KRAMA DESA ADAT .....	1
Palet 1 : Indik Krama.....	1
Palet 2 : Indik Prakanggen Desa.....	4
Palet 3 : Indik Kulkul .....	6
Palet 4 : Indik Sangkepan Utawi Paruman .....	6
Palet 5 : Indik Padruwen Desa.....	8
Palet 6 : Indik Laluputan .....	8
Palet 7 : Indik Dadosan Patedunan .....	9
Palet 8 : Indik Rarampagan .....	9
Palet 9 : Indik Bhaya .....	10
Palet 10 : Indik Penanggran Desa/Banjar.....	10
CATHURTAS SARGGAH : SUKERTA TATA PALEMAHAN .....	10
Palet 1 : Indik Tegal, Bangket lan Karang .....	10
Palet 2 : Indik Kekayonan .....	12
Palet 3 : Indik Wawangunan.....	13
Palet 4 : Indik Wawalungan .....	13
PANCAMAS SARGGAH : SUKERTA TATA AGAMA.....	15
Palet 1 : Indik Dewa Yadnya.....	15
Kaping 1 : Indik Kahyangan .....	15
Kaping 2 : Indik Pengaci-aci.....	15
Kaping 3 : Indik Pemangku.....	16
Kaping 4 : Indik Sukertan Pura Kahyangan.....	17
Kaping 5 : Indik Cuntaka, Sosot .....	18
Palet 2 : Indik Resi Yadnya .....	20
Palet 3 : Indik Pitra Yadnya.....	21
Palet 4 : Indik Manusa Yadnya .....	22
Palet 5 : Indik Bhuta Yadnya.....	22
PALET SARGGAH : SUKERTA TATA PAWONGAN .....	22

SAJĀ SAKSĀKĀRI ŚĀSTĀRĀKĀŚĀKĀRMAṆĀNĀM

13

Paṭṭa 1. Āndra Rājyaṭ

14

Paṭṭa 2. Āndra Rājya Vāhikāśāstrānāṁ Śāstrānāṁ

15

Paṭṭa 3. Āndra Śāstrā

16

Paṭṭa 4. Āndra Śāstrānāṁ

17

Paṭṭa 5. Āndra Śāstrānāṁ

18

ŚĀSTĀRĀKĀŚĀKĀRMAṆĀNĀM ŚĀSTĀRĀKĀŚĀKĀRMAṆĀNĀM

19

Paṭṭa 1. Āndra Śāstrānāṁ

20

Paṭṭa 2. Āndra Śāstrānāṁ

21

ŚĀSTĀRĀKĀŚĀKĀRMAṆĀNĀM ŚĀSTĀRĀKĀŚĀKĀRMAṆĀNĀM

22

ŚĀSTĀRĀKĀŚĀKĀRMAṆĀNĀM ŚĀSTĀRĀKĀŚĀKĀRMAṆĀNĀM

23

**PRATAMAS SARGGAH  
HARAN LAN WAWIDANGAN DESA**

**Paos 1**

1. Desa puniki mawasta Desa Adat Apit Yeh, selantur ipun kinucap kalih kasuratang sajroning lekita, banung Desa Adat Apit Yeh.
2. Jibag kakuwub wawidangannya mawates natur :
  - ha. Tepi siring lor uthawi kaler : Desa Adat Selumbang lan Bukit Catu
  - na. Tepi siring wetan uthawi kangin : Desa Adat Pekarangan
  - ca. Tepi siring kidul uthawi kelod : Desa Adat Buitan
  - ra. Tepi siring kulon uthawi kauh : Desa Adat Manggis
3. Sajroning wawengkon Desa Adat Apit Yeh, wenten babanjaran sowang-sowang mawasta :
  - ha. Banjar Adat Kangin
  - na. Banjar Adat Kelod
  - ca. Banjar Adat Kawan
  - ra. Banjar Adat Kaler

**DWITAS SARGGAH  
PIKUKUH LAN TATUJON**

**Paos 2**

Maka pikukuh Desa Adat Apit Yeh, ngarajegang, mikukuhin, kalih mitindihin pisan :

1. Pancasila, pinaka Dasar Negara Republik Indonesia.
2. Undang-Undang Dasar Republik Indonesia 1945.
3. Sahanan Sukerta Negara Republik Indonesia
4. Panca Sada
5. Tri Hita Karana.

**Paos 3**

Desa Adat Apit Yeh ngamanggehang patitis tatujon, lwir ipun :

1. Nguttamayang tata cara maagama Hindu.
2. Ngawangunang katreptyan sajroning Desa Adat, mangda kasiddhan rajeg katreptyaning praja.
3. Ngawerddhiyang kawicaksanan minakadi kprajumanan, maka larapan gumawe gemuh landuhing praja.
4. Ngamanggehang kalih ngarwedddhiyang padrewyaning Desa, majalaran kawicaksanan guna laksana manut dharma-prawretti.
5. Ngarajegang Dharma Agama miwah Dharma Negara.

**TRITYAS SARGGAH  
SUKERTA TATA KRAMA DESA ADAT**

**Palet 1**

**Indik Krama**

**Paos 4**

1. Nane kasinanggehang Krama Desa Adat Apit Yeh, lwire :

- ha. Sang sapasira hugi jenek magenah ring wawengkon Desa Adat Apit Yeh, lintang ring tigang sasih (105 hari), rejeg maagama Hindu.
  - na. Sang sapasira hugi wed saking Desa Pakraman/Apit Yeh, jenek magenah ring dura Desa liwaring Desa Apit Yeh, nanghing kanton mipil ring banjar sinalih tunggal sane wenten ring sajroning Desa Adat Apit Yeh
2. Papalihan krama Desa, kadi ring sor puniki :
- ha. Krama Ngarep : wantah krama Desa bulangkep, sane sampun mipil ring banjar adat sinalih tunggal sane wenten sajroning Desa Adat Apit Yeh.
  - na. Krama sesabu : inggih punika, krama sane durung/nenten mipil ring banjar adat, sekadi teruna teruni, miwah sane sawosan.
  - ca. Krama tamyu : punika krama sakadi sane kinucap ring sor puniki :
- 1) Sang sapasira hugi saking dura Desa liwaring Desa Adat Apit Yeh, jenek magenah ring wawengkon Desa Adat Apit Yeh, tan ngawengku karang pomahan madadunung ring pomahaning krama Desa, magenah ring pomahan druwen Guru Wisesa, miwah salwiripun lintang ring tigang sasih uthawi 105 dina.
  - 2) Sang sapasira hugi wed saking liwaring Desa Adat Apit Yeh, makakubon ngenahin palemahan: tegal, carik palasan ring wawengkon Desa Adat Apit Yeh, nanghing kari manggch makrama Desa ring Desaniya sowang-sawang.
  - 3) Sang sapasira hugi jenek magenah ring wawengkon Desa Adat Apit Yeh yan tan maagama Hindu, taler sinanggch tamyu sakewanten tan sareng sapalikramaning Desa Adat Apit Yeh.
- ra. Krama ring dura Desa  
Sang sapasira hugi wed saking Desa Adat Apit Yeh, jenek magenah ring dura Desa liwaring Desa Adat Apit Yeh, nanghing manggch mipil ring banjarniya nguni mekadi mipil ring Desa Adat Apit Yeh.

#### Paos 5

Ngawit tedun makrama Desa, ring Desa Adat Apit Yeh :

1. Sang sapasira hugi sane wed kalih jumenek ring wawengkon Desa Adat Apit Yeh, sampun mipil ring banjar adat sinalih tunggal sane wenten sajroning Desa Adat Apit Yeh, malarapan antuk, tateragan banjar, lwire; pinaka panyundul wyadin tujuh, bulangkep, ngamongin karang pomahan.
2. Krama neledihi malarapan antuk tateragan banjar sang katerag nedih risampun mayusa 17 warsa uthawi sampun munggah truna, sampun mrasiddhayang nganutin krama, manut panglokika prajuru Desa.
3. Sang sapasira hugi wed saking dura Desa, sampun tigang sasih (105 dina) jenek magenah ring wawengkon Desa Adat Apit Yeh, katerag antuk banjar sane ngawawa pagenahannya.
4. Sang sapasira hugi sinalih tunggal wed saking Desa Adat Apit Yeh matinggal kadura Desa, wastu malih mewali ke Desa Adat Apit Yeh.

- 1a. The following table presents data, including cost per unit and unit volume variance. Calculate the unit volume variance.
- 1b. The following table presents data, including cost per unit and unit volume variance. Calculate the unit volume variance.

Page 8

- 1. Calculate the unit volume variance for the following data.
- 2. Calculate the unit volume variance for the following data.
- 3. Calculate the unit volume variance for the following data.
- 4. Calculate the unit volume variance for the following data.
- 5. Calculate the unit volume variance for the following data.
- 6. Calculate the unit volume variance for the following data.
- 7. Calculate the unit volume variance for the following data.
- 8. Calculate the unit volume variance for the following data.

Page 9

- 1. Calculate the unit volume variance for the following data.
- 2. Calculate the unit volume variance for the following data.
- 3. Calculate the unit volume variance for the following data.
- 4. Calculate the unit volume variance for the following data.
- 5. Calculate the unit volume variance for the following data.
- 6. Calculate the unit volume variance for the following data.
- 7. Calculate the unit volume variance for the following data.
- 8. Calculate the unit volume variance for the following data.
- 9. Calculate the unit volume variance for the following data.
- 10. Calculate the unit volume variance for the following data.



- ta. Sang sapasira hugi magenah ring wawidangan Desa Adat Apit Yeh tan makrama Desa, tan kelugra ngelaksanayang Panca Yajna ring wawidangan Desa Adat Apit Yeh, tan kalugra nganggen salwiring druwen Desa.
  - sa. Krama Tamyu sane tan maagama Hindu swadharman ipun kemanggehang sajroning pararem/paswara Desa.
2. Phalapeksaning Krama Desa :
- ha. Krama Desa samyan yogya polih pasayuban wiyadin pangoban saking Desa, salwiring wyawaharanyu yogya kabawosan antuk prakanggen Desa manut tatatining wicara.
  - na. Krama Desa samyan wenang ngalaksanayang Panca Yajna sajroning Desa Adat Apit Yeh, manut sajroning sastra agama lan dresta.
  - ca. Krama Desa ngarep, wenang polih babagian layuban aci-aci salwir ipun, twas-twasan, miwah sawosan sane patut katiba ring krama Desa.
  - ra. Mepawangkid, mapiteges nunas laluputan ayah-ayah, ritatkala sungkan minakadi cuntaka.
  - ka. Ngidih mapiteges ngaluputin ayah, urunan, miwah papeson ritatkalaning sungkan, nanghing sesampun kenak patut kakenenin ayah-ayah, urunan miwah pepeson manut hunggwan sowang-sowang krama.
  - da. Sane dados nuksukin ayahan sang tan tedun mayahan yogya saking panglokikan kalih palugrahan prajuru Desa.

#### Palet 2

#### Indik Prakanggen Desa

#### Paos 8

- 1. Desa Adat Apit Yeh kahemong antuk prakanggen Desa
- 2. Bendesa/Kelihan Adat kasanggra antuk :
  - ha. Patajuh uthawi pangliman pinaka wakilnyane.
  - na. Penyarikan pinaka juru surat.
  - ca. Juru raksa utawi petengen pinaka pengraksa sraja druwen Desa
  - ra. Prajuru Desa pinaka pangliman Desa.
  - ka. Saya pinaka juru arah.
  - da. Pecalang
- 3. Sajroning ngenterang sukertan niskala Bendesa/Kelihan Adat mingsinggihang pemangku Kahyangan Desa.

#### Paos 9

- 1. Sane wenang kahadegang wiyadin kamanggehang dados Prangkanggen Desa Adat Apit Yeh lwire :
  - ha. Mula wed, jenek magenah, saha makrama Desa saurah-arih ring Desa Adat Apit Yeh
  - na. Tan cedangga, sekadi peceng, perot, cungh lan sapanunggilan ipun.
  - ca. Wikan mamawos kalih nurat aksara Bali uthawi latin.
  - Ra. Ten nahen mebukti melaksana corah
- 2. Pidabdab ngadegang Bendesa/Kelihan Adat :
  - ha. Paruman Desa ngawentenang saseliran, pengawit paruman Desa matujuwang sang pacang kahadegang dados Bendesa/Kelihan Adat. Yan tan kantos lintangan ring asiki

sane katuju antuk paruman Desa, yoga pinilihan sane akehan, sane akedikan wenang turut.

- na. Mungging ngadegang petajuh, penyarikan, juru raksa utawi petengen, saking panudin Bendesa/Kelihan Adat sane kabriyukin antuk paruman Desa, taler sane akedikan wenang turut.
- ca. Lamine madeg Bendesa/Kelihan Adat wantah enem warsa, sajaba kapadgatakalan.
- ra. Yan sang sampun nahen madeg pinaka Bendesa/Kelihan Adat, wenang kasudi malih sajroning paruman Desa.
- ka. Yan wenten sinalih tunggil piwal kalaning kasudi antuk paruman Desa, sang piwal punika wenang katiwakin panglekika, yan tan manut paksanya yoga kabawosan antuk paruman Desa, yan jati tuhu paksanya, paruman Desa wenang nudi sane sawosan.
- da. Bendesa/Kelihan Adat, patajuh, penyarikan, juru raksa lan prajuru patut mawinten ring Pura Desa

#### Paos 10

Swadharmaning Bendesa/Kelihan Adat lan prajuru :

1. Midabdabin Desa, krama Desa, pacang ngupadi kajagaddhitan sakala niskala, maka darsana awig-awig Desa, pararem Desa, nganutin uger-uger negara minakadi nganutin sastra Agama Hindu.
2. Ngarancana salwiring sane nandang pacang wangunang, sane patut hayum, manut lokika. Sane mabuwat, kasidhan polih palugrahan guru wisesa.
3. Mawosin salwiring wyawahara sane wetu sajroning Desa Adat Apit Yeh, niwakang pamutus uthawi tetimbang. Yan tan kasiddhan kabawosan ring Desa, Bendesa/Kelihan Adat ngaturang ring Guru Wisesa mangda kabawosan.
4. Mratyaksa, nulingayang sapari polah prajuru Desa, lwire : Kelihan banjar Adat, kelihan Subak, Pemangku kahyangan Desa, minakadi sane sawosan sane wenten sajroning wawengkon Desa Adat Apit Yeh.
5. Minabdabin pamargin salwiring aci-aci ring Desa Adat Apit Yeh, taler nulingayang krama Desa indike ngalaksanayang Panca Yajna.
6. Bendesa/Kelihan Adat wenang nanggra salwiring pituduh, minakadi saraja karya saking Guru Wisesa, werat uthawi ringan, sane yoga katiwak ring Desa Adat.
7. Wenang ngewangunang lang lang Desa kewastaning pecalang, sane patut ngelang langin saraja karyan Desa, nulinga katreptian sawengkon Desa Adat Apit Yeh, selantur ipun indik ngadegang swadharman miwah swadikaran ipun mungging sajroning pararem Desa.

#### Paos 11

Phalapeksaning Prakanggen Desa :

1. Luput daging miwah salwiring paturunan wiyadin wawijilan ring Desa.
2. Wenang polih twas-twsan manut deresta kuna.
3. Miwah sane sawosan manut pamutus paruman Desa.

#### Paos 12

Bendesa/Kelihan Adat kagentosin, majalaran antuk :

1. Seda.
2. Mabukti sungkan-sungkunan.
3. Mapinunas sangkaning rahayu sampun polih lugraha saking paruman Desa.
4. Majalaran tutug sengker pangadege.
5. Sangkaning kahusanang antuk paruman Desa dwaning mabukti iwang.

**Palet 3**  
**Indik Kukul**  
**Paos 13**

1. Sajroning wawengkon Desa Adat Apit Yeh, wenten babacakan kukul, kadi ring sor puniki :
  - ha. Kukul Desa kabawos Tegteg-agung.
  - na. Kukul pura.
  - ca. Kukul tempek.
  - ra. Kukul banjar
  - ka. Kukul pahuman
  - da. Kukul sekeha sawosan
2. Mungging swaran kukul punika mangda mabhina-bhinayan sawiji sowang, manut sor singgih. Yan wenten swaran kukul patch, karun wiyadin sawer, mangda kapastika salah siwiji, antuk sang madruwe.
3. Nepek kukul manut Tri Brata Sandi: dharma, sima, laksana, tegesipun :
  - ha. dharma : swaran kukul maka cihna wiyadin tatenger upacara agama wiyadin yajna.
  - na. sima : swaran kukul maka cihna wiyadin tatenger panca bhaya.
  - ca. laksana : swaran kukul maka cihna tatenger patedhunan.
4. Indik tatepekan kukul manut pasebhaya minakadi kuna dresta, pararem.
5. Unggwan nepek kukul :
  - ha. Yan nepek kukul tatenger patedhunan, hugi kukul sane kadruwe antuk sekeha, krama sane pacang tedhun, katepek antuk sang patut ngukulang.
  - na. Yan nepek kukul tatenger panca bhaya. Wenang katepek antuk sang rihinan manggihin bhaya punika, minakadi saking pituduh sang ngawiwenang.
  - ca. Yan nepek kukul tatenger upacara agama, dewa yajna, bhuta yajna, manusa yajna, pitra yajna, wenang kukul sane wenten ring sowing-sowang genah upacarane. Yan nyelang kukul sawosan patut wenten palugrahan sang ngawiwenang.
  - ra. Yan kalaning ngalungayang bhatara, mendak bhatara kalaning pacaruwan Desa Iwire manca-satha, manca sanak, tabuh gentuh ring Desa Adat Apit Yeh, sami kulkule dados swarayang, tatepekan manut dresta.
  - ka. Yan wenten sinalih tunggil mamurug, nepek kukul tan manut dresta, yogya kabawosan antuk Bendesa/Kelihan Adat, katiwakang panglokika, saha pamidandha manut pareram.

**Palet 4**  
**Indik Sangkepan Uthawi Paruman**  
**Paos 14**

Mungging sangkepan uthawi paruman sajroning wawengkon Desa Adat Apit Yeh ring sor puniki :

1. Sangkepan Prajuru Desa, magenah ring Wantilan Desa Adat Apit Yeh, wyadin genah sawosan, napkala dina Buda Pon utawi dina sane lianan manut pasubhayan, yan tan kasiddhan rahina punika, wenang karangkadang apanutan, teges ipun malih pitung rahina saking dina pasangkepane.
2. Sane patut nedhunin sangkepan punika, Bendesa lan Prajuru Desa minakadi sang sapasira hugi sane kabuwatang Bendesa/Kelihan Adat.
3. Maka manggalaning mabawosan, manggeh Bendesa/Kelihan Adat Apit Yeh utawi wakil nyane.
4. Paruman uthawi pasamuhan Desa Adat Apit Yeh :
  - ha. Sane yoga tedun sareng sajroning paruman wiyadin pasamuhan Desa Adat Apit Yeh, sang sapasira kapatut sareng sajroning sangkepan Desa Adat Apit Yeh, maweweh kelihan-kelihan banjar adat, Pemangku Kahyangan Desa, Kelihan Sekehe Teruna, minakadi sang sapasira sane kabuwatang, manut pangundang wiyadin panuhur Bendesa/Kelihan Adat.
  - na. Paruman wiyadin pasamuhan punika kawentenang pinih sor ngalih temwang, mungging dina minakadi genah pasamuhan, nganutin dresta, mawit saking pamutus babawos sangkepan Desa Adat Apit Yeh.
  - ca. Pasamuhan punika, taler wenang kawentenang padgatakala, manut werat wiwarane sane patut kabawosang, mawit saking pamutus babawos parareman sajroning sangkepan Desa Adat Apit Yeh.
5. Sangkepan Banjar Adat.
  - ha. Sangkepan banjar-banjar adat, hugi ngasasih teges ipun 35 dina, dinan ipun manut awig-awig banjar sowang-sowang.
  - na. Kelihan Banjar pinaka manggala ring sangkepan banjar adat.
  - ca. Saya, manut pagilih hurak.
6. Sangkepan sekeha-sekeha sane wenten sajroning Desa Adat Apit Yeh manut Awig-Awig sekeha sowang-sowang. Iwire : sekeha subak, sekeha teruna miwah sane sawosan.

#### Paos 15

Tata kramaning sangkepan, paruman uthawi pasamuhan :

1. Paruman Desa mabusana adat jangkep.
2. Paruman sane siosan mabusana adat madya.
3. Saya patut makta pasayaan, teges eteh-ete pasayaan salwir ipun, minakadi haturan canang panaracak.
4. Yan kapatut pacang nganggen bebanten sakabwatan, Bendesa/Kelihan Adat, Kelihan-Kelihan banjar adat, yoga mitudhang mangda cumawis, saha nuksrahang padagingan ipun.
5. Saya wenang nepek tengeran ping tiga :
  - ha. Kaprathama lan kaping kalih : sadurung ngawit upacara uthawi maturan, pinaka pakeling mangda gelis carem.
  - na. Kaping tiga; swaran tengeran maka cihna sangkepane sampun ngawit nepak kulkul maswara ping tiga.

6. Babawosan sajroning sangkepan wiyadin paruman, hugi ngupadi karahayon jagat, minakadi ngarajegang kamuruban Sang Hyang Widhi, majalaran bhawa laksana manut catur dresta lwir ipun desa dresta, loka dresta, kuna dresta miwah sastra dresta.
7. Yan wenten sinalih tunggil ngatengahang babawos jroning sangkepan, yogya kadamyakang, yan nyandang bawosin, yogyarinawesan, yan tan nyandang bawosin, antukang ring sang ngamimitin.
8. Sane kinucap pamutus babawos wiyadin pasrawa jroning sangkepan, paruman minakadi pasamuhan, yan briyuk sapanggul hanut sang nangkepin. Yan tan sapunika, asing akehan wenang turut manut lokika. Pamutus babawos yogya kalekitayang, kalaksanayang manut hanggeran ipun.
9. Sangkepan punika kabawos puput, yan sampun mabacak.

**Palet 5**  
**Indik Padruwen Desa**  
**Paos 16**

Sane kadruwe antuk Desa Adat Apit Yeh, lwire :

1. Pura Kahyangan Tiga, miwah kahyangan-kahyangan :
  - ha. Pura Puseh Apit Yeh palebahan linggah ipun 1091,73 m<sup>2</sup>.
  - na. Pura Dalem Apit Yeh linggah ipun 160,92 m<sup>2</sup>.
  - ca. Pura Taman Beji linggah ipun 2016 m<sup>2</sup>.
  - ra. Penyimpanan Ida Betara Kahyangan Tiga linggah ipun 10,5 x 10,00 = 105 m<sup>2</sup>.
  - ka. Pura Desa/Bale Agung linggah ipun 24,00 x 20,00 = 480 m<sup>2</sup>.
2. Palemahan sane kaanggen karang paumahan, miwah telajakan karang.
3. Pelemahan sane kaanggen Setra Adat. Setra Desa Adat Apit Yeh kekepah dados 3 manut wiguna lwire :
  - ha. Setra genah mendem anak alit sane hantaka sane durung maketus ring sisi kangin apit lawang .
  - na. Setra genah mendem uthawi pakingsan sawa krama Desa widangan ring sisi kangin genah pemuunan
  - ca. Setra genah ngeseng sawa lan atiwa-tiwa wewidangane genahne ring tengah setra.
4. Palemahan sane kaanggen margi, rurung, telabah, sajroning Desa Adat Apit Yeh.
5. Banjar-banjar adat sane wenten sajroning wewidangan Desa Adat Apit Yeh.
6. Tanah padruwe Desa Adat Apit Yeh, Wantilan-Bale Desa.
7. Sakancan kalebutan toya, anakan, tihisn, sane dados kaanggen Pasuciyen Bhatara, sane dados kaanggen beji miwah kasalud antuk Krama Desa, sane dados tantan ke Desa Adat, sami kadruwe antuk Desa Adat Apit Yeh.
8. Lembaga Perkreditan Desa (LPD) lan *Community Based Development* (CBD) pinaka pelaba pura Desa.

**Paos 17**

1. Pralinggan Bhatara, bhusana, payas-payasan kesimpén ring penyimpanan Desa
2. Krama Desa patut sareng mretnin saha mratyaksayang padruwen Desa.
3. Parade Desa kicalan mawaneng dina ketara icale, prajuru Desa patut ngemargiang panangaskara permangkin, prajuru Desa patut ngaturang indik punika ring sang amawarat,

yan sampun wenten pamutus saking sang amawarat, sang memandung patut ngawalyang prabya panangaskara sane kawijilang antuk Desa, yan pandung punika wed krama Desa.

#### **Paos 18**

Pyolih-olih Desa Adat Apit Yeh :

1. Urunan krama Desa.
2. Sesabuhan lan penanjung batu.
3. Rarampagan.
4. Haturan-haturan minakadi dana punia.

#### **Palet 6**

#### **Indik Laluputan**

#### **Paos 19**

Luput mapiteges nenten keni raramon, wawijilan uthawi papeson kalaning aci :

1. Bendesa/Kelihan Adat lan utawi Prajuru Desa
2. Pemangku Desa
3. Juru arah utawi saya
4. Langlang Desa (Pecalang)
5. Sang sapa sira hugi sane kapineh antuk Desa patut nandang polih laluputan manut paswara/pararem

#### **Palet 7**

#### **Indik Dadosan Patedunan**

#### **Paos 20**

Dadosan patedunan, sangkepan tedun makarya miwah sane sawosan, nganutang sukerta sowang-sowang lwire :

1. Yan Desa madruwe pathedunan, yogya nganggen sukertan Desa, sane kagaduh antuk Bendesa/Kelihan Adat dedosan ngeranjing ke Desa.
2. Yan Bebanjaran medruwe pathedunan, yogya nganggen sukerta Banjar sowang -sowang dedosan ngeranjing ke Banjar.
3. Yan Subak medruwe pathedunan, yogya nganggen sukertan Subak sane sampun kagaduh antuk Subak sowang -sowang dedosan ngeranjing ke Subak.
4. Yan sekeha-sekeha lianan meduwe pathedunan, yogya nganggen huger seka sowang-sowang, dedosan ngeranjing ke sekeha.
5. Yan wenten sinalih tunggil tan tinut tatepasan miwah dedosan punika, yogya katengahang babawose ke Desa. Bendesa/Kelihan Adat lan Parjuru wenang mawosin.
6. Agung alit dedosan sane katerapang ring wawidangan Desa Adat Apit Yeh lwire: ring Desa, ring Banjar, ring Subak-Subak minakadi sekeha-sekeha sawosan mungguh sajroning pararem sowang-sowang.

#### **Palet 8**

#### **Indik Rarampagan**

#### **Paos 21**

1. Desa Adat Apit Yeh wenang ngerampag, ritatkala pacang mepawangun, ngaryanin wewangunan ring pura Kahyangan Desa, ngerampag ring tegalan, palasan, karang suung,

- sane wenten sawawengkon Desa Apit Yeh, sane wenang rampage: wit tehep, wit cempaka, wit angka, wit wangkal, wit kelapa, sane sampun wayah, panganan dados anggen lakar wewangunan.
2. Mungging indik ngerampag taru, wit kelapa, hugi majalaran antuk pararem pamutus pasamuhan Desa Adat Apit Yeh, bwate ngamargiyang rarampagan kadamyakang ring Krama Desa.
  3. Indik ngrampag raramon, lwire : ron, busung, hambu, tihing, sahang. Ritatkala Pujawali Patirthan Bhatara ring Kahyangan Desa, Pecaru Tabuh Gentuh ring Desa Apit Yeh, Karya Agung sawosan sakadi ngenteg linggih, nubung daging ring Kahyangan Desa. Wenang ngarampag ring pategalan, palasan, karang suhung, sajroning palemahan Desa Adat Apit Yeh. indike ngarampag sakadi ring sor puniki.
    - ha. Wenang ngarampag wantah asoroh sajroning asukat.
    - na. Hambu amuncuk sajroning asukat
    - ca. Busung amuncuk sajroning asukat.
    - ra. Ron Kalih papah sajroning asukat.
    - ka. Tihing akatih sajroning alingseh, manut pagilih rarampagan (sukat tihing dados anggen tali, tan kawasa ngudanan, wayahan wenang).
    - da. Carang taru sane nungkulin margi agung, rurung Desa, wit taru ring tanah ayah Desa, hamung carang ipun dados rampag.
  4. Godel sane pacang anggen pacaru (bayang-bayang) wenang rampag, nanghing matahur manut pangarga.
  5. Yan kalaning ngrampag sang ngrampag hugi masadok ring sang madruwe wiyadin ring panakap sinalih tunggil, saha sadu hajeng. Yan tan masadok dandha sang ngarampag, gung artha sakadi pangargan sane karampag anikela.

**Palet 9**  
**Indik Bhaya**  
**Paos 22**

1. Sane kinucap panca bhaya lwire ipun, jiwa bhaya, agni bhaya, toya bhaya, artha bhaya, bayu bhaya.
2. Salwiring bhaya wenang gegerak antuk swaran kulkul.
3. Sang sapa sira hugi krama Desa sane manggihin wyadin huning ring panangkaning bhaya, ring kang katiben bhaya, wenang ngegerak nepek kulkul manut indik kakulkulan bahaya raris damyakang ring krama Desa.
4. Rikala wenten swara kulkul bulus tetenger bhaya, krama Desa patut yatna sayaga, saha seregep ngamong prabot wyadin gegawan sowang-sowang.
5. Yan sampun tatas ring bhaya punika, krama Desa patut matulung nambakin wyadin ngamesihan bhaya punika manut hunggwan, kalih manut patuduh sang yogya ngawi wenang.
6. Sang sapa sira hugi tan kawasa majajabur uthawi majarah rikalaning Desa, Krama Desa katiben bhaya. Yan wantah sinalih tunggil kacirenin mamurug, yogya katengahang ka Desa, wyadin katur ring sang mawa bhumi, mangda kabawosin.

7. Yan pinganan bhaya punika sampun kapineh nahnah, tan pacang nyengkalen, wenang kacihnayang antuk swaran kulkul lambat atuludan, wyadin pasiar saking sang ngawiwenangang.

**Palet 10**  
**Indik Pananggran Desa/Banjar**  
**Paos 23**

1. Rikala puja wali patirtan ring Pura Puseh, ring Purnamaning Kapat ngamasa-masa, kesanggra antuk banjar-banjar manut pagilih sasubakara, kewantu olih seka teruna sane wenten ring Desa Adat Apit Yeh.
2. Ritat kala karya tabuh gentuh ring Desa Adat Apit Yeh minakadi karya agung sane kawentenang padgatakala, karyane kesanggra antuk krama Desa, babanjaran sami, Desa sesabu, sekeha teruna sane wenten sajroning Desa Adat Apit Yeh.

**CATHURTA SARGGAH**  
**SUKERTA TATA PALEMAHAN**

**Palet 1**  
**Indik Tegal, Bangket lan Karang**  
**Paos 24**

Palemahan Desa Adat Apit Yeh, mahuger antuk Tri Mandala, lwire :

1. Uthama Mandala : palemahan sane kaanggen karang pura, wiyadin parhyangan.  
Madhya Mandala : palemahan sane kaanggen karang pomahan genah wewangunan, sakadi : banjar, sekolahan, kantor miwah sane sawosan.  
Nista Mandhala : palemahan sane kaanggen setra, margi, rurung, telabah, papunduk, tulak tanggul miwah sane sawosan.
2. Sahanan palemahan sane wenten ring wawengkon Desa Adat Apit Yeh, yoga mangde madruwe babaledan wiyadin wates sane pasti.
3. Sahanan palemahan punika hugi mangde madruwe margi, rurung, papunduk sane dados hentasin.
4. Yan wenten pakarangan Pura, pomahan, tegal, carik miwah palemahan sawosan kabebeng tan madruwe margi, rurung, miwah papunduk, sang madruwe patut ngatengahang babawose ka Desa. Prakanggen Desa yoga negdeg, ngutsahayang babawos mangde polih margi malarapan sami suka. Yan patut matumbas, manut pangargan tanah sane kamanggehang antuk sang mawarat. Sami kahatur antuk sang mamuwatang.
5. Yan Desa pacang ngalinggahang margi, rurung, minakadi makarya margi, rurung Desa saking sampun ingkup peraram Desa, yan nganggen tegal, carik miwah palemahan sawosan, wenang tan nahur pangargan tanah punika. Nanghing yan madaging tatanduran, papayon, wawangunan salwire, Desa patut ngicen prabeya agung alit manut parembug Desa.
6. Sahananing karang pomahan hugi mangde masengker. Pidabdab nengker magaleng ka dulu. Penengker sane sisi kangin miwah kaler, patut kakaryaning antuk sang ngenahin karang punika. Sajaba karang ngele, wiyadin lingkehin rurung, palemahan suwung.
7. Sang sapasira hugi ngenahin karang tegehan, patut naku, tegehe asukat tanah dangsah, sane tebenan wenang nusunin tembok.



8. Telajakan karang patut kapiara antuk sang ngenahin karang punika sowang-sowang, mangda mapikenoh tur hasri.
9. Yan wenten sinalih tunggil nadya naleksek wiyadin ngaleklek babaledan salwiring babaledan wiyadin wawatesan, lwire: babaledan wiyadin wates pura, karang pomahan, carik, tegal, setra, telabah, jlingjing, margi, rurung, papunduk miwah sane sawosan, yogya katiwakan dandha manut wrat ringan kahiwangane, saha mahayu sane kaslesek wiyadin kaleklek, kalih mrayascita sakabwatan, sane nyandang kaprayascita.
10. Yan hana sinalih tunggil ngaletihin, ngarucakin, ngarobedin, ngararabin, palemahan liwaring pomahan padruweyan nane, lwire : ngutang luhu, bangkaan, miwah salwir ipun, norongang babanon sajaba toyan sabeh, yogya katiwakan dandha gung artha: tur mahayu sane kaletahan, karucakan, karebedan, raraban inucap ring hajeng.
11. Yan wenten anak ngenahin palemahan sajroning wawengkon Desa Adat Apit Yeh tan tinut makrama Desa nganutin awig-awig miwah paswaran/pareram Desa, tan kalugra nganggen salwiring druwe Desa tan kalugra ngelaksanayang Panca Yajna sajroning Desa Apit Yeh. Yan tekaning kapatyan dados sawubang uthawi pendem ring setra teben uthawi setra pangilang-ilangan, tan polih pananggran krama banjar minakadi penanggran krama Desa.
12. Yan wenten anak tan maagama Hindu ngenahin palemahan sajroning Desa Adat Apit Yeh patut nganutin paswaran/pareram Desa Adat Apit Yeh.
13. Sang sapasira hugi krama Desa Apit Yeh, yan pacang ngadol, ngantahang, maselangang, majegang, makedihang palemahan sajroning wawidangan Desa Adat Apit Yeh, hugi mangda polih palugrahan Desa Adat Apit Yeh, yan wenten mabukti mamurug indike punika patut kahandegang.
14. Tan kalugra ngadol, ngantahang masalahang matimbang karang Desa ring kaya siyos waris minakadi krama saking dura Desa, sakancan karang suwung kawasa wasita antuk Desa Adat Apit Yeh.
15. Sane kabawos karang suwung inggih punika karang sane nenten medaging sanggah pawon.
16. Prade wenten krama mawicara ngarebutin karang Desa mawit saking kulawarga warisan uthawi sane sawosan, wenang prajuru Desa mawosin tur ngichenin pamutus, nanghing prade tan cumpu, jantos raris ming tiga matemuwang bawos taler patch pamutuse, prajuru Desa ngichenin sang mawicara galah neng awarsa, risampun awarsa, sang mawicara kantun manggeh ring sowang-sowang pinunas mawuh pakayunan, Desa wenang ngewawa karang hinucap.

**Palet 2**  
**Indik Kakayonan**  
**Paos 25**

1. Tan kalugra nebtob, ngrebah, wit-witan salwir ipun, ring palasan, pategalan, habing, tangkid miwah genahe sawosan sane kakeker antuk Desa. Yan wenten sinalih tunggil mamurug, katiwakan dandha manut lokika, taru sane karebah mantuk ka Desa.
2. Salwiring wit-witan sane sampun kacirenan wiyadin kasawenin antuk Desa pacang mangge mapawangun ring Desa, pradene punika karebah antuk sang madruwe, yogya sang madruwe katiwakan dandha manut lokika, taru wiyadin wit-witan sane karebah mantuk ka Desa, wiyadin ngitung pangarga.

3. Yan wenten wit-witan wiyadin kakayonan ngungkulin palemahan anak sawos, sane ngawinang tiyeb, tampyas, ngarebedin, asing kungkulan wenang ngatengahang ka Desa, prekangge Desa maritetes saha mituduhang sang madrewe mangda ngrancap nebtob, wiyadin ngarebah. Yan kantos ping tiga pituduh Desa tan kalingu, wenang katiwakan dandha sang anikel tuduh, gung artha manut pararem/paswara. Kakayonan punika prasiddha karebah antuk Desa picundhangan (ngranjing ke Desa).
4. Tanem tuwuh (kelapa, jaka) jroning karang pomahan, tan kalugran tegeh ipun lintang ring jan palit solas ( $\pm 5m$ ), bungkil ipun adepa agung ( $\pm 2,5 m$ ) saking panengkere ngajrowang. Yan mamurug wenten ngatengahang ka Desa, yogya sang madruwe katiwakan dandha gung artha manut pararem/paswara, saha ngarebah sajroning tigang rahina saking pamuput babawose.
5. Kakayonan jroning karang pomahan hugi mapyara mangda tan ngeletehin, ngarebedin, mamayanin karang sawosan, saking akah kantos daun ipun. Yan wenten mamurug, tan tulinga ring kakayonan duwe wenten ngatengahang ka Desa, prangkagen Desa yogya maritetes, saha nepasin manut panglokika.
6. Yan wenten wit taru mentik kantos ageng ring babaledan, wates, salwiring babaledan mwanng wates, wenten ngatengahang ka Desa, patut taru punika karebah, raris pinara tiga, apahtigayan mantuk ka Desa, sang maduwe babaledan apahtigayan sowang-sowang.
7. Yan wenten sinalih tunggil nundungin tanem tuwuh, kakayonan, sane kaswatah pacang mamayen, wenang kabawosang ring sang madruwe. Yan akas sang madruwe, yogya katengahang ka Desa. Prakanggen Desa negdeg tanem tuwuh wiyadin kakayonan punika, yan manut panglokika prekanggen Desa yogya tundungin, taler akas sang madruwe patut sepat gantungin. Yan jati kadi panwatahe yogya sajroning tigang dina, karebah picundangan. Sang madruwe katiwakan dandha gung artha manut pararem/paswara Desa anikel tuduh. Yan tan yukti kadi panwantahe, sang ngatengahang katiwakan dandha gung artha manut paswara Desane angadaken nora. Tanem tuwuh wiyadin kakayonan punika tan karebah.
8. Yan wenten sinalih tunggil nadya nandur pijer, turus salwiring tanem tuwuh wiyadin kakayonan sane pacang dados ageng, nesek ring babaledan, ring wates papundukan hugi masupeksa ring prakanggen Desa, kalih ring pananding sowang-sowang. Yan tan kalugra tan kapisukayang, piradene kapurug, yogya sang mamurug katiwakan dandha gung artha manut pararem/paswara tur ngemadhemang tatandurane.

**Palet 3**  
**Indik Wawangunan**  
**Paos 26**

1. Sang sapisira hugi krama Desa sawawengkon Desa Adat Apit Yeh, yan pacang ngawangun panenger karang pomahan, patut masupeksa ring panandinge. Yan tan radin yogya nunas degdegan ring prangkangge Desa negdeg saduhajeng sang mawicara.
2. Wawangunan ring palemahan pecak carik, tegal, palemahan suwung sane sampun masanggah pawon, palemahan punika prasiddha kabawos karang pomahan, dwaning sampun katiwakang pangupakaran karang. Awanan patut madruwe rorong betel ka margi agung, sukat dados pacang ngalintangang sawa ring carik miwah tegal. Yan wenten

- mamurug, yogya prangkange Desa niwakang tatepasan mangda sang mamurug mrayascita palemahan hinucap.
3. Yan tan masanggah panguluning karang, kabawos akakubon. Tan yogya genah angraksa sawa. Yan wenten mamurug, yogya katiwakan pamidandha mrayascita palemahan ika.
  4. Yan wenten sinalih tunggil pacang ngawangunang wawangunan genah ngalaksanayang upakara agama lwire: Pura, Masjid, Gereja, Wihara miwah sane sawosan, hugi mangda lekita palugrahan prakange Desa, kalih lekita palugrahan guru wisesa, yan wenten mamurug, kabawos tan siddhakaryya, tan wenang anggenen.
  5. Wawangunan jroning karang pomahan, hugi nganutin Tri Mandhala: utama mandhala, sanggar panguluning karang; madya mandhala : pagenahan mapumahan; nista mandhala : ngaran lebu, jabayan.
  6. Tan wenang ngungkulng capcapan wawangunan ka jroning karang pomahan sawosan tan druwe. Yan wenten mamurug, wenten ngatengahang ka Desa yogya prakange Desa negdeg, saha nipat gantungin. Yan jati lintang, sajroning selae (25) rahina saking puput babawose mangda sampun kapastika.
  7. Tan wenang nganggen tembok umah wiyadin tembok penengker tan druwe. Wenang ya kasambatsara antuk sang madruwe. Yan akas tur mamurug sang kasambatsare, yogya katengahang ka Desa. Kabawosan antuk prakange Desa.
  8. Sang sapisira hugi pacang mapawangun nepi ring margi agung, nepi ring rurung Desa, yogya wenten lekita palugrahan sang mawarat, wiyadin lekita palugrahan Prakanggen Desa Adat. Yan tan polih lekita palugrahan, padgatakala wawangunan punika dados katundungan tan ngetang prabheyan tatundungan.
  9. Sang sapisira hugi ngawengku karang pomahan, yogya hurati myara kahasrian lebu, pakarangannya, rurung pentasan pinih sor asukat karangnya ngelajur.

**Palet 4**  
**Indik Wawalungan**  
**Paos 27**

1. Sane kinucap wawalungan, sakancan buron suku pat sane nadya kapyara, sakadi: bawi, banteng, kambing, kebo, misa, jaran miwah sapanunggilan ipun, taler watek makampid sane nadya kapyara, sakadi: ayam, hangsa, itik, dolong miwah sababacakan ipun.
2. Sang sapisira hugi krama Desa sane myara wawalungan suku pat, sajaba hasu tan wenang ngalubar. Sane patut matlusuk mangda matlusuk, sane tan patut matlusuk mangda mategul, sane patut maglogor, makandang, patut maglogor wyadin makandang. Mangda tan ngarucakin, ngaletihin palemahan tani druwe miwah mamayen krama Desa jana pada. Yan hasu mangda mabelat lwire: makalung bawong, maka cihna wenten sane myara. Yening wenten krama mamurug patut keni pamidanda beras 20 kg beras sane becik.
3. Sang sapisira hugi krama Desa myara watek suku kalih, watek makampid yatnain hugi mangda tan banget ngarucakin, ngaletihin palemahan, pomahan, tatanduran druwen anak sawos. Yening wenten mamurug keni pamidanda 20 kg beras sane becik.
4. Tan wenang ngangonang, negulang, hingon-hingon ubuh-ubuhan, ring Setra, palemahan tan druwe, minakadi tan sasakapan druwe yan tan kapisuyakang. Sang madruwe palemahan, perakange Desa, langlang/pecalang Desa, asing mamanggihin, wenang

- nambatsara sang madruwe wawalungan ika. Yan hakas sang kasambatsara wawalungan ika wenang taban, prakangge Desa yogya nŕwakang pamindanda 50 kg beras sane becik.
5. Yan wenang ngangonang, nggulang ubuh-ubuhan ring palemahan karang Pura Kahyangan, pura sewosan, salwiripun, minakadi setra, rorong, pepunduk, margi, telajakan tan druwe, palemahan sane kapitgitang, karang subung, miwah sabacakanipun. Yan wenten mamurug sang madruwe palemahan, Prakangge Desa, Langlang Desa, sinalih tunggil aning ngamanggihin, wenang nambatsara, saha naban wawalungan ika. Katengahang ka Desa, katiwakan dandha gung artha 20 kg beras sane becik, saha mahayu yan wenten karusak, tur matyascita palemahan ika sane nandang prayascita, manut panglokika.
  6. Yan wenten maubuh-ubuhan sajroning karang pomahan hugi tljakan mratyaksayang kandangipun, mangda tan ngawetuang bhaya, panungkat. Taler mangda hapik, guriten, priksa, mangda tan kancos ngelehetin, ngobetin cerobo karang pomahan wiyadin palemahan panandinge. Yan wenten mamurug, tan riksa ring hingon-hingon miwah kandangipun, wenang panandinge nambatsara. Yan hakas sang kasambatsara, wenang katengahang ka Desa, prakangge Desa nepasin. Wenang katiwakan dandha, manut panglokika.
  7. Sang sapanira hugi Kratta Desa ngawangunang kandang wawalungan : burwat adol atuku. Yan kandang wawalungan suku pat, dagingin adasa hukud; yan kandang ayam, itik miwah sapanunggilanipun, burwat naluhang, miwah adol atuku. Yan kandang wawalungan suku pat dagingin adasa hukud, yan kandang ayam, itik miwah sapanunggilanipun, dagingin satus (100) hukud, sowang, ika wenang jroning karang pomahan. Yan lintangan ring punika dagingin kandang, tan wenang wangunan jroning karang pomahan, yogya kawangunang ring palemahan sane mawaneng sasoripun seket depa (75 m) saking palemahan karang pomahan, sekolah, kancos, pura Kahyangan, minakadi genah sane kakeker antuk Desa Adat Apit Yeh. Tur mangda malekita palugrahan saking sang mawa bhumi.
  8. Yan wenten wawalungan ngarucakin, nguwug tatanduran, wenang taban. Sang madruwe tatanduran ngatengahang ka Desa pramangkin, kabawosan antuk prakangge Desa, saha katiwakan dandha manut lokika.
  9. Yan godel, banteng, kebo, misa, durung marlusuk; godel, jaran, kambing miwah sabacakanipun, durung hantes manegul tan wenang taban, yan tan ngajak hinanipun. Yogya salabarang ring sang madruwe.
  10. Yan bebek, dolong, hangsa, ayam miwah sapanunggilanipun ngarucakin tatanduran, taler wenang taban. Indike taban mangda masaksi, saha kasupeksayang ka Desa pramangkin, prakangge Desa yogya matyawosan nŕwakang pamindanda manut panglokika.
  11. Yan wenten wawalungan ngeleh, manegat, ngaranjingin palemahan pura, pura kahyangan, setra, karang pomahan, miwah sane sawosan, lokikanen juga. Yan tan nadya kalebang, tan yogya taban wenang salabarang ring sang madruwe. Yan nadya ka lebang wenang taban, tur katengahang ka Desa.
  12. Sang sapanira hugi Kratta Desa Adat Apit Yeh, tan kalugra norongang babanon laleteh kandang wawalungan ka telabah, jalingjing, sane wenten sajroning Desa Adat Apit Yeh. Yan wenten mamurug katiwakan dandha antuk Desa gung artha manut lokika, saha sajroning pitung rahina saking pamuput babawose, kalih selanturipun tan kari sorong bahanon miwah laleteh punika.

13. Sang sapasira hugi ngarereh ulam ring tukade, ring telabahe, ring jalingjinge miwah sahunggwani ulam sawawengkon Desa Adat Apit Yeh, tan wenang nganggen tuba salwiripun, ngrusak hempelan miwah tamuku, yan wenten mamurug wenang katiwakan dandha gung artha manut lokika mahayu sane karusakang.
14. Sakancan dadandhan, dadosan sane mungguh ring hajeng, sami ngranjing ka Desa Adat Apit Yeh.

**PANCAMAS SARGGAIH  
SUKERTA TATA AGAMA**

**Palet 1**

**Indik Dewa Yadnya**

**Kaping 1 :**

**Indik Kahyangan**

**Paos 28**

1. Pura Kahyangan Desa kahemponin antuk Krama Desa Adat Apit Yeh sami, manut pagilih pangaci-aci. Sapunika taler indik papayon, kahemponin antuk Desa Adat Apit Yeh manut dresta kalih pararem/paswara.
2. Pura Subak/Hulunsui, papayon kalih pangaci-aci kahempon antuk krama subak sane nyungsi ring pura Subak/Hulunsui punika sowang-sawang.
3. Pura-Pura, Kahyangan sane sawosan ring sane kinucap ring hayun, papayon kalih pangaci-aci kahemponin antuk krama pemaksan sane nyungsi ring Pura Kahyangan punika sowang-sawang.
4. Mungging beji, papayon kalih pangaci-acinya, kahemponin antuk krama Desa sane naben nalud toya punika, kabawos Pemaksan Sekeha Beji.
5. Yan wenten kerecehan, wicara sajroning Pemaksan Pura, Beji, Kahyangan, sinalih tunggil, wenang katengahang ka Desa; Prakanggen Desa mamawosin, nepasin wicarane, mangda kasiddhan mawali landuh jatimula.
6. Tan wenang nguwah nguwihin wawilangan palinggih Bhatara, sane sampun wenten ring Pura Kahyangan sowang-sawang, mangda kantun manggeh kadi kuna.
7. Yan wenten sinalih tunggil Pura Kahyangan, reneng pangaci-acinya kantos kadasawarsan, yogya prakanggen Desa Adat Apit Yeh mamawosin, ngutsahang pisan mangda kasiddhan mawali kadi jatimula. Nanghing prade tan kasiddhan, prasiddha Desa Adat Apit Yeh ngupakara mralina pura punika, mangda tan karanjingan kaumahin antuk Bhuta Kubandha.

**Kaping 2 :**

**Indik Pengaci-Aci**

**Paos 29**

1. Indik pengaci-aci ring Desa, ring pura kahyangan Desa sane wenten sajroning wewengkon Desa Adat Apit Yeh kehamongin antuk krama Desa mungging dinan pengaci aci manut gegaduhan kalih pararem/paswaran Desa.
2. Sane yogya muput haci-aci ring pura kahyangan Desa sane kadruwe antuk Desa manut dresta.
3. Pengaci Pura Puseh

- ha. Patirthayan wiyadin panetoyan agung ring Pura Puseh Apit Yeh rikala dina Purnama Kaput, sakewanten yan nemoning ingkel wong, Patirthayan kelaksanayang rikala dina Purnama Kelima, taler nemoning ingkel wong, patirthayan kelaksanayang rikala dina Purnama Ketiga.
  - na. Aci-aci kasanggra antuk krama Desa, sekeha taruna sawewengkon Desa Adat Apit Yeh.
  - ca. Lwiring bebanten manut gagaduhan Pura Puseh Apit Yeh.
  - ra. Padagingan pacang ngaci-aci, saking peturunan Krama Desa, haturat-haturan krama suka.
  - ka. Yan wenten sinalih tunggil Pura Kalyangan, sinarengan piodalane ring patirthan ring Pura Puseh Apit Yeh, tan kalagra ngaribinin pangodale.
4. Pura Desa utawi Bale Agung, rikala Purnamane Kaput utawi sinarengan ring patirthayan ring Pura Puseh.
  5. Aci ring Pura Dalem lan Prajapati, patirthyanyane kalaksanayang rikala Tilem Kadasa, Pura Dalem Apit Yeh kahempon antuk Desa Adat Apit Yeh. Indik penghaci-aci kahemponin antuk Desa Adat Apit Yeh.
  6. Pengaci mesegéh, mesantalan ketiput, rikaluning sasih sada nemo kajeng kliwon.
  7. Aci ring taman beji kemargiang ritakala nemoning buda kliwon Pahang.
  8. Sane kalagra muput salwiring haci-aci ring Pura Puseh-Bale Agung, Pura Dalem lan Prajapati, miwah ring Pura Taman Apit Yeh. Solinggih sane katutur antuk Desa, tur kasanggra antuk pemangku Desa song-song kesarengit taler pemangku pura sane lianan.
  9. Rikala kabrebehan jagate, kagringat, katiben panca bhaya, pinganan tan mresidhayang ngaturang aci kadi patute, yoga Prakanggan Desa miwah Pamangku ngaturang pihuning ring Ida Sanghyang Widhi, masadhana bebunten guru pioduka, maka cihna tan pegat aci-acine.
  10. Yan ritakala mamahayu, ngayun pupayon, ring Pura-pura Kalyangan, pinganan tan puput kala ditaning piodalan, pangacine wenang rangkadang nanghing ngaturang pioduka tan dados pegatang. Riwus puput masasapuh salwire, malih mawali kadi kuma.

#### Paos 30

1. Indik pengaci-aci Pura Pamrajan, Puhbon, Dadya, punika kahamongin antuk krama Desa sajroning sekeha dadya, pamrajan, manut sima drestanya sowang, tan singsal ring ucaping sastra Agama Hindu.

#### Paos 31

2. Beji sane wenten lianan punika kaaci-acinin antuk sekeha beji, krama Desa sane nalud toya punika. Dina pangodal kalih babanten, manut dresta sekeha sowang-sowang.
3. Yan wenten sinalih tunggil beji tan kaaci-aci, toyanipun tan yoga anggen sadhana makarya sarwa suci.

#### Kaping 3 :

#### Indik Pemangku

#### Paos 32

1. Pidabdab ngadegang pamangku :
  - ha. Ngambil saking sascerod santana wiyadin katurunan.

- na. Saking pamuwus sesemburan, wiyadin njanjan kantos ping tiga.
- ca. Sangkaning kajujuh saha kabriyukin antuk krama Desa Adat Apit Yeh.
2. Sang tapasira hugi pinaka jan bangga, Pamangku ring Pura Puseh Desa Adat Apit Yeh minakadi ring Pura Kahyangan sajroning Desa Adat Apit Yeh, mangda pageh ngamel kalih ngalaksanayang sasanan Pamangku.
  3. Sang tapasira hugi Krama Desa, sangkaning saserod, sangkaning kasenangan antuk Bhatara polih pamuwus ring sasemburan, minakadi kajujuh kabriyukin antuk Krama Desa, pacang kaanggen pamangku, yan kari alaki rabi yogya lanang istri mawinten.
  4. Sang kasudi pacang kaanggen Pamangku, patut mawinten ring Pura genahe dados jan bangga; mungwing prabeya kasandangin antuk pamaksan pura sowang-sowang, yan ring Desa antuk krama Desane sami, taler kaangkat ring geria.
  5. Pamangku patut madruwe hamongan pura sowang-sowang, yan tan madruwe hamongan pura, prasiddha tan kalugra ngantebang babantenan ring pura-pura salwire.
  6. Sinalih tunggil Pamangku yan katekan pati, yogya tiniwaken. Patut polih patulung prabeya atitiwa, saking krama pura sane kahamongin, agung alit patulunge nganutin pamutus tatawos sajroning parareman kala punika. Yan wus tiniwaken, patut kakaryanang pangelad wiyadin pepegatan antuk krama hinucap. Punika yan pamangkune kari rajeg ngamong swadharmaning pamangku kantos antaka.
  7. Pamangku kagentosin majalaran antuk:
    - fa. Sangkaning Seda.
    - na. Mapinunas mararyan, saking patut pinunase, nanging tan kari ngalaksanayang dharmaning Pamangku. Kawekas kalaning seda tan polih patulung prabhaya.
    - ca. Saking patut pinunase, majalaran antuk lingsir, sampun tan mampuh sungkan rahat tan kengin waras. Kajadayang antuk krama pura, wiyadin Desa. Kawekas kalaning seda patut polih patulung, prabhaya atatiwa.
  8. Patyas uthawi olih-olihan pamangku lwire :
    - fa. Luput ayatkan, urunan miwah wedalan ring Desa.
    - na. Polih cacahan salwiring papalihan.
    - ca. Sasarin canang polih apeteluan ring soang pura.
    - ta. Patyas siosan manut pararem/paswaran Desa.

**Kaping 4 :**  
**Indik Sukertan Pura Kahyangan**  
**Paos 33**

Kicalaning maturan hamung pamangku ring kahyangan punika dados munggah tedun ring palinggih-palinggih Pura Kahyangan hinucap. Sajawaning sang sampun polih lugraha saking prajuru. Yan wenten mamurug katiwakan dandha mrayascita palinggih punika.

Pamangku sate patut ngantebang babanten ring pura, wantah Pamangku sane kadruwe antuk pura punika. Yan wenten pamangku ring pura punika uthawi kapialang dados nyarad pamangku sawosan, saking palugrahan Prangkange Desa Pakaraman Apit Yeh.

Tan kalugra masumpah, macoran sajroning Pura Kahyangan sinalih tunggil, sajaba sangkaning wicara pura hinucap, taler saking pamuwat krama Desa sane ngempon Pura Kahyangan.

4. Tan kalugra wakcapala sakadi mamisuh miwah sapanunggilan ipun, hasta capala (nyagur), pada capala sakadi nendang, nlejek, miwah sapanunggilan ipun, sajroning Pura Kahyangan. Yan macihna wenten mamurug, wenten raris ngatengahang ka Desa yogya tiniwakan dandha pamarisuddhan kahyangan.
5. Tan kalugra malaksana kantos ngawetuang biota ring Pura Kahyangan. Yan wenten mamurug kantos mayata ring pura, yogya tiniwakan dandha gung artha manut pangargan beras adasa (10) kg kang sawiji saha marisuddha kahyangan.
6. Sang sapisira hugi kacuntakan, salwiring cuntaka, yan durung mabersih tan kalugra ngaranjing ka Pura Kahyangan. Yan katenger wenten mamurug, yogya tiniwakan dandha marisuddha ipun tan kalugra maseha ring Pura Kahyangan sinalih tunggal.
7. Sedahan hengengan miwah sapanunggilan ipun, tan kalugra maseha ring Pura Kahyangan sinalih tunggal. Yan wenten mamurug, yogya dandha gung artha manut pararem/paswara saha ngawangdeyang maseha.
8. Tan kalugra ngawentenang kaklecan, jajuden, ring utama mandala, Madhya madhalaning Pura Kahyangan, yan wenten mamurug sang ngelaksanayang katur ring sang amawa rat, tur jejuden punika kewangdeyang
9. Tan kalugra makta salwiring sane kasinanggeh tan suci ka jroning Pura Kahyangan. Yan wenten mamurug yogya sang mamurug marisuddha Pura ika.
10. Sang sapisira hugi rikalaning makemit ring Pura Kahyangan, yan merem tan kalugra madukan lanang istri, sajaba anak sane kapineh kari alit, durung rumaja putra, yan mamurug keni dandha manut pangargan beras 10 kg, tur mrayascita pura punika.
11. Pamaksan swang-swang Pura Kahyangan sawawengkoning Desa Adat Apit Yeh kalugra madruwe sukreta ndiri-ndiri nanging tan dados singsal ring Pasukretan Desa Adat Apit Yeh.
12. Pura Kahyangan tan wenang anggen sajaba ngalaksanayang upacara agama Hindu. Yan wenten macihna mamurug sang malaksana kawangdeyang, tur pakardinya kapuceh, saha sang ngalugrain kadandha manut pangargan beras 100 kg, maweweh ngawentenang upakara panyangaskara.

**Kaping 5 :**  
**Indik Cuntaka, Sosot**  
**Paos 34**

1. Sang sapisira hugi krama Desa sane kahanan cuntaka, tan wenang ngaranjing ka Pura Kahyangan, kapanuciyen kalaning nuci gening, minakadi genah salwiring genah sane kinucap suci pingit. Tan wenang ngaryanin saji salwiring saji sane pacang katur ka sanggar, sakadi suci gening, minakadi banten salwir ipun sane jaga katur ka pura, miwah sane katur ring pitra pindha. Sajawaning banten sane pacang katur ka Prajapati, Dalem panguluning setra, dados karyanin ring umah sang cuntaka kalaning mangupakara sawa.
2. Lwir sane kinucap cuntaka:
  - ha. Anak istri kalaning ngraja-swala. Suwen cuntakane, saking ngawit ngrajasewala, kantos nat, macihna sampun malukat.
  - na. Sang nganten lanang istri. Suwene cuntaka, ngawit saking rahina pangantenane, wiyadin rahina merangkate, sajroning tigang dina, kantos puput mabyakawon, saha semayut prayascita, malukat matirtha.



- ca. Rama rena cuntaka sangkaning madruwe oka. Sang lanang cuntaka, suwene saking mbas anake alit kantos kepus odel nyane, raris malukat. Sane istri pinaka rena, cuntaka petang dasa kalih rahina saking wahu mbas rarene.
3. Cuntaka malarapan antuk kasedayan, kapatiyen :
- ha. Yan sang ngarepin, minakadi sang magenah sajroning karang pohaman sang seda, suwene cuntaka saking wawu seda kantos puput panglemek karyane, mawaneng malih tigang dina. Punapika mapendem, luwih yan atitiwa. Macihnayang punah cuntakane antuk marerebu, malukat.
- na. Yan sang polih ninjo, ngarap sawa, nggamel saha ngarembat saheteu-eteu upakara pula-palining sawa, cuntaka tigang dina, punah cuntaka macihnayang antuk malukat.
- ca. Yan sang manjing mijil ring umah sang ngaraksa sawa, sasurwen sawa wiyadin layone karaksa, pateh cuntakane kadi sang ngarepin sawa ika, lewih yan tunggil siddhikara, pateh cuntakane kadi sang ngarepin sawa ika.
- ra. Yan sang manjing mijil ring umah sang ngaraksa sawa, wiyadin layon sangkating aninjo, tan kahanan cuntaka waluya mapas sang makta sawa ring margi agung.
- ka. Yan sang polih nembah sawa, mangan paridan sawa, punika taler kabawos cuntaka. Suwene kantos sesampun malukat.
4. Cuntaka sangkaning malaksana mamitra ngilang. Suwene cuntaka, salamine mamitra ngilang.
5. Anak wetu sangkaning smara dudu (tan pawidhi widana), babinjat, punika taler cuntaka. Suwene cuntaka salamine durung wenten meras, wiyadin nuduk ngangkenin piyanak, wiyadin nganggen dadaman.
6. Cuntaka sangkaning macihna madruwe panungkan sane tan dados waras salamine, kadi angganing hila, buduh, ngawijilan reged saking silit, bhaga, purus, tan henap mamres, brung borok tahunan mabaneh miwah salwir punika. Suwene cuntaka, salamine tan waras.
7. Cuntaka sangkaning cedangga sane kabakta saking wawu mbas saking garbha wasaning ibu. Punika tan kawenang napak palemahan panuciyen genah nuci gening.
8. Yan wenten sinalih tunggil sang cuntaka ngaraksa sawa wiyadin layon mamanan uthawi mapakayun ngarawuhin karya hayu atma wedhana, minakadi mabhakti ring sang wenang bhaktinin, dados nanging tan wenang nggrap, ngarembat, nuwun, nggambel, saupakaran puspa lingga.
9. Yan wenten sinalih tunggil Krama Desa durung tutug cuntaka kadi ucaping harep, mamurug larangan, yan wenten ngatengahang ka Desa, Prakangge Desa niwakang pamindandha, yoga sang mamurug marisudha sakabwatan manut panglokika.
10. Yan wenten sinalih tunggil anak sitri, sangkaning tan meha ngrajaswala sasampun ring pura, wiyadin ring genah larangane sawosan raris kacirenan wenang ya tiwakin dandha tanmeha, yoga marisuddha genah punika, katulung antuk pamaksan pura wiyadin pangemonge sowang.
11. Rikalaning Krama Desa tedun makarya, sang kacuntakan hamung dados ring nista mandala ring pura. Yan mamurug wenang kadandha mrayascita.
12. Yan wenten sinalih tunggil Krama Desa, kacuntakan antuk ngraksa sawa, wiyadin layon, napkala pagilih pagantosan subak babanjarannya ngaci-aci ring sinalih tunggil kabhayaan Desa, pacaruwan ring Desa, sadurung tutug senger cuntakannya, wenang tan tedun

mayahan, tan dinosan. Nanghing yan wenten pasadok sang cuntaka ring Prakanggen Desa. Yan wus tutug cuntakane, patut neregteg yan kari ngalantur patedunane. Mungging peturunan, pawijilan daging salwir ipun, yoga katahur naregteg sasampun tutug senger punah cuntakane. Dados kahetang pangarga.

13. Yan cuntaka gamya gamana, Prakanggen Desa ngaturang sang malaksana ring sang mawarat, yan sampun wenten pamutus, katiwakan dandha kadi ring sor puniki, lwire: mrayascita raga, genah malaksana, kahyangan Desa, ring Desa Adat. Prade yan katiwakan pamidandha memandal, prasida Desa mrayascita tur sang malaksana kabawosan saha kicen pamutus antuk Prakanggen Desa manut pamutus pararem Desa.
14. Cuntaka sangkaning macihna salah timpal, cuntaka ragan sang malaksana mwah Desa pagenahannya, tutug cuntakanya yan sampun sang malaksana mrayascita panangaskara raga, genah melaksana salanturnya Desa mrayascita.
15. Anak luh beling tan kapariangken, suwene cuntaka kantos lekad rarene saha wenten pangupakara kulawisudha.
16. Yan wenten anak macihna nyolong smara, cuntaka pateh ring cuntaka gamya gamana.

#### Paos 35

1. Indik Sosot :
  - ha. Yan wenten sinalih tunggil pacang nahur sosot wiyadin punagi, salwiring punagi, gumanti sane patut nganggen pamegat sosot, tan dados nahur sosot yan tan kalaning dina piodalan. Ngadasa dinayang aci-aci, sang pacang nahur punagi patut sampun masadok ring Kelihan Pura, yan ring Kahyangan Desa panahurane masadok ring Prakanggen Desa. Panahuran punagi ika, kapuput antuk Sulinggih sasampun putus banten pangodale, uthawi pamangku sowang-sowang.
  - na. Yan wenten sinalih tunggil nahur sasangi pacang ngaturang piodalan hugi mangda pagantosan dina piodalan. Sang nahur punagi, wenang nunas kanti patulung karya ring pamaksan. Sang nahur sesangi nuksrahang daging cumek saprabheyaning pangodal ring pamaksan pura.
  - ca. Yan wenten sinalih tunggal nahur sasangi maturan swaran tangguram salwiring tatahuban, sasolahan, minakadi salwir ipun, mungging prabheya punika sami kaangganin antuk sang masasangi.
2. Haturan  
Yan wenten sang sapasira hugi ngaturang jinah, mwan sarupaning barang punika sami patut kahunadikayang antuk Prakanggen Desa, Kelihan Pamaksan Pura swang-swang, mangda kasiddhan mapwara hayu. Haturan punika kaungguhang jroning lekita.
3. Sasarin Canang  
Sasampun puput pangaci-aci puja waline, sasarin canang punika kapupulang saha kawilangin. Kahunadikayang antuk Prakanggen Desa, Kelihan Pura. Indik tatiwak kalih pamargin ipun, sangkaning jati nirmala.

#### Palet 2

#### Indik Resi Yajna

#### Paos 36

1. Krama Desa Adat Apit Yeh, yogya ngawrediyang kaprajnanan, kaultaman Sang Hyang Aji, asewaka nunas pawarah ring sang maraga widagdha prajnan, pingajeng ring sang kasinanggah guru loka.
2. Prakanggen Desa, Kelihan-Kelihan Banjar Adat, ngutsahayang kawrediyang kamuruban kaultaman Sang Hyang Aji, ngawentenang pasamuhan-pasamuhan, parembukan, pinaka genah Krama Desa mamangguhang pawarah-warrah hayu.
3. Kalaning dewasa hayu, wenang Desa atirtha yatra, wenang Desa ngaturang puniya miwah resi bhojana ring Ida Pedandha. Taler kalaning karya utama ring Desa, salwiring karya sane kaputus antuk Sulinggih patut ngaturang puniya. Asapunika taler ring sang mapitulung patut maweh dana.
4. Sang sapisira hugi krama Desa Adat Apit Yeh, yan mapakayun pacang mapodgala taler mangda wenten pasadok ring Prakanggen Desa, sajaba palugrahan saking guru wisesa.
5. Sang sapisira hugi krama Desa Adat Apit Yeh mamanan pisan, yan krama Desane mapuniya ring sang prajnan, ring sang widagdha, ring sang satata ngarajegang dharma, pingajeng ring Sulinggih sowang-sowang.

**Palet 5**  
**Indik Pitra Yajna**  
**Paos 37**

1. Pamarggi ngupakara sawa, hugi manut daging sastra Agama Hindu.  
Wenten akudang-kudang soroh, sakadi hinucap ring sor puniki:
  - ha. Mapendem ring prathiwi.
  - na. Makingsan ring ghni.
  - ca. Atiwa-tiwa, pelebon, ngaben.
  - ra. Tan rare durung makupak huntu, wenang nganggen pangentas bangbang tan wenang tiniwaken.
  - ka. Yan rare durung kepus hodel, pamali ngaran, pendhem juga tan hana pangupakaranya (hamung ganten adem paicchan Sulinggih)
2. Sang sapisira hugi krama Desa Adat Apit Yeh, tan kawasa makta sawa ka Desa Adat, yan sawa ika sampun keni pangupakara sawa. Yan wenten mamurug, yogya katiwakan dandha, myarascita marisuddha Desa.
3. Salwiring upakara atiwa-tiwa, plebon, ngaben, ring setra hugi kawenanganya, tan wenang ring Desa Adat. Sajaba layon Sulinggih. Yan wenten mamurug, wenang dandha marisuddha Desa. Krama Desa sang atutulung, dandha artha : 30 kg beras
4. Tan wenang nekeh sawa yan tan macamana, mabresih, lintangan ring pitung dina, ngawit saking dina seda. Yan wenten mamurug dandha gung artha 30 kg beras saha mrayascita Desa.
5. Sang sapisira hugi krama Desa Adat Apit Yeh, tan wenang atitiwa, ri kala pangaci-aci Desa lwire. Yan wenten mamurug, dandha mrayascita Desa, minakadi krama Desa sane matulung dandha gung artha 30 kg beras.
6. Yan wenten sinalih tunggil Krama Desa mendhem sawa kalaning dina malarang kadi inucap ring ajeng, kawasa nanging hugi masawen, durung masusunin bintak, laku kingsan ngaran.

7. Yan makingsan ring ghni, sawa gineseng, hasti hinanut, manut krama. Munggwing dewasa sor ipun dewasane dados marginin mendhem sawa.
8. Indik Padewasan:
  - ha. Padewasan mendhem ring prathiwi, makingsan ring ghni, wenang katiwakang antuk Kelihan Banjar Adat sowang-sowang, wiyadin Bendesa/Kelihan Adat.
  - na. Padewasan atiwa-tiwa, katiwakang antuk Ida Pedandha sane pacang muput, *yogya* kapatut antuk Prakanggen Desa Adat Apit Yeh.
  - ca. Tan wenang ngutang ngirim, teges ipun, sajroning setra tunggil yan wenten ngirim, tan dados sane sawosan mendhem sawa, minakadi atiwa-tiwa, ngaben ring dina punika. Yan wenten mamurug, *yogya* dandha gung artha 100 kg beras
9. Yan wenten sawa sangkaning salah pati, angulah pati, mati kapangawan minakadi salwir ipun. Desa tan ngalarangin yan sawa punika tiniwaken pramangke. Saha ledang sang madruwe, minakadi Sulingih sane pacang muput.
10. Yan wenten sinalih tunggil sawa, genahe seda wiyadin padem, sajaba ning karang pomahan lwire: ring tegal, ring carik, pura, pasar, banjar, sekolahan, minakadi genah sawosan dudu karang pomahan, *yogya* sang madruwe wirange mrayascita marisuddha genah punika. Yan sawa tan keparihangkenan, genah punika patut kaparisuddha kaprayascita antuk sang madruwe hemponan.
11. Sang sapasira hugi Krama Desa Adat Apit Yeh, yan kalaning angkatma wedhana, lwire : ngroras, patileman, baligya, tan wenang ngawangunang petak, payajnan, ring palemahan Pura Kahyangan Desa, Nista, Madhya, Utama mandhala. Yan wenten sinalih tunggal mamurug, wenang danda gung artha : 100 kg beras, saha mryascita marisuddha pura ika.
12. Sang sapasira hugi wus ngawangun karya angkatma wedhana, *yogya* karang yajna ika kapralina, sakasep ipun petang dasa kalih dina saking dina karyane.

### **Palet 3**

#### **Indik Manusa Yadnya**

#### **Paos 38**

1. Sang sapasira hugi krama Desa Adat Apit Yeh, ngawangunang salwiring upacara manusa yajna, tan wenang magenah ring wawidangan palemahan Pura Kahyangan Panyiwiyang Desa, ring Nista, Madhya, Utama mandhala. Yan wenten sinalih tunggal mamurug, wenang dandha gung artha : 100 kg beras sane becik
2. Indik manusa yajnya sane dados kemargiang sajroning Desa Adat Apit Yeh hugi sane nganutin dresta kuna minakadi sastra agama.

### **Palet 5**

#### **Indik Bhuta Yajna**

#### **Paos 39**

1. Sajroning Desa Adat Apit Yeh, pacaruan manut unggwan, kalih sor singgih, lwire :
  - ha. Pacarun Desa, Caru pemangkalan, kawentenang nuju dina Kajeng Kliwon sadurung kasanga.
  - na. Pecarun Desa rikala Kesanga ring perempatan Desa caru manca lan ring Sekolah caru ayam selem alembur

- ca. Pacarun Desa Padgatakala: rikala jagate kbrebehan, kageringan, katiben panca-bhaya miwah sane sawosan.
- ra. Agung alit caru, manut unggwan caru, babwatan pacaruwan, kalih alit Madhya Utamaning caru.
2. Pacaruan ring pura-pura Kahyangan, Pamaksan, Pamrajan Dadya, salwire, manut dresta minakadi awig-awig gagadhuan Pura swang-swang.
  3. Pacaruan ring Pura Dalem Desa Adat Apit Yeh, manut dresta gagadhuan Pura Dalem.
  4. Pacaruan kalaning Tilem Kasanga, ring karang pomahan sowang-sowang, kalanturang antuk catur brata penyepiyan.

## SAT SARGGAH SUKERTA TATA PAWONGAN

### Palet 1

### Indik Rangkat

### Paos 40

1. Indik rangkat punika, manut sima dresta sane kapatutur tur katinutin antuk Krama Desa tan singsal ring uger-uger lwire :
  - ha. Papolihan
  - na. Merangkat uthawi ngerorod
2. Sajroning Desa Adat Apit Yeh, indik rangkat ika, yan sampun mawidhi widhana alit, Madhya, utama, rangkat punika kasinanggih puput palikrama.
3. Yan wenten anak istri sinalih tunggil , karangkatang antuk sang sapasira hugi. lwih antuk anak saking dura Desa, yan kantos tigang dina saking dina hicale tan wenten pasadok pajati, yogya sang madruwe wirange nunas kanti ring Prakangge Desa Adat Apit Yeh, mangda ngamargiyang sasrepan. Yan sampun sinah genahnya, ngraris ngamargiyang panegdeg.
4. Sang sapasira hugi Krama Desa Adat Apit Yeh, yan karawuhan tamyu praya masinutan malarapan antuk ngarorod, hugi mangda masadok mihuningang ring Prakanggen Desa. Prakanggen Desa yogya maritetes. Yan sangkaning tan patut pamargin rangkatnya, prakanggen Desa laju nuksrahang ring Guru Wisesa. yan wenten mamurug, yogya sang mamurug dandha gung artha : 100 kg beras
5. Yan wenten sinalih tunggil Krama Desa Adat Apit Yeh, ngamet anak istri antuk mlagandang, mamendet, marikosa miwah salwir ipun, tan sangkaning sami demen, tan yogya pinuput pawidhi widhananya sadurung wenten pamutus saking Guru Wisesa.
6. Yan wenten sinalih tunggil saking dura Desa, pacang muput rangkat kawawengkon Desa Adat Apit Yeh, sang madruwe wirang luh yogya nunas upasaksi ring Prakanggen Desa Adat Apit Yeh, sinalih tunggil mangda wenten ngarawuhin.
7. Yan wenten sinalih tunggil ngamet anak istri pinaka rabi tan manut sima dresta minakadi sastra agama Hindu, yogya katur ring sang mawa rat mangda mamawosin.

### Pawos 41

### Ngarug Sesana

1. Yan wenten anak lanang mobotin anak istri sane sami-sami durung maduwe rabi, tur sabda kapariangken, katur babawose ke desa. Prakanggen desa patut ngutsahayang sangkalih

- mangda majangkepan alaki rabi, tur mawidiwidana pawiwahan kadi patute.
2. Yan wenten sinalih tunggal krama desa mobotin anak istri, salah sanunggal sampun maduwe rabi, pada-pada sampun meduwe rabi, wirangnya patut ngaturang wicara punika ring sang mawa rat. Yan wus hana pamutus, Desa Adat wenang niwakang pamidanda pawuwuh manut pararem/paswara

### Palet 2

#### Indik Belas Makurenan/Napiyan

##### Paos 42

1. Sane kabawos napiyan, pinaka sang palas marabi, palas makurenan, sane sampun katiwakan pamutus antuk Guru Wisesa.
2. Yan wenten anak istri wit saking wawengkon Desa Adat Apit Yeh, napiyan ring dure Desa, mawali ka Desanya, yogya sang madruwe wirang mrayascita marisuddha anake luh punika. Yan tan kaparisuddha antuk wirangnya, patut marisuddha raga, mangda tan kasinangguh cuntaka.

### Palet 3

#### Indik Balu

##### Paos 43

1. Sane kabawos balu, anak istri katinggal seda antuk rabine. Yan anak lanang seda rabine, wiyadin katinggalan napiyan, taler kawastanin balu.
2. Yan wenten sinalih tunggal krama desa lanang balu,wyadin istri balu,ngawengku karang pomahan,yogya mapayahan asele
3. Yan wenten balu lanang ngawengku karang, maduwe sentana luh sampun hantes mayahan, yogya mayahan bulangkep
4. Yan wenten balu istri,maduwe sentana lanang, sampun hantes mayahan, yogya mayahan bulangkep
5. Yan wenten sinalih tunggal anak istri balu merangkat, yogya rangkat punike kapuputang antuk wirang lakine rihin, yan bebalon punike kari pageh
6. Mungging wawenangan babaluan luh uthawi rangda, ring indik wawarisan minakadi sane sawos-sawosan, nganutin huger-uget sane karajegang antuk Guru Wisesa.

### Palet 4

#### Indik Sentana

##### Paos 44

1. Sajroning Desa Adat Apit Yeh, ngarajegang pidabdab Santana kapurusa siddhikara tunggal, paperasan, tunggal siddhikara.
2. Sang sapasira hugi sinalih tunggal krama Desa Adat Apit Yeh, meras sentana, nuduk mantu, makedihang uthawi nerahang raga, yogya sangkaning radin, tunggal siddhikara, tunggal dadya, saha polih palugrahan saking Guru Wisesa.
3. Indik meras Santana, nuduk mantu, nukserahang raga, sasampun polih palugrahan saking Guru Wisesa, yogya kadulurin antuk upakara manut sastra Agama Hindu sakabwatan swang, sinaksenan dening Prakanggen Desa Adat Apit Yeh.

**Palet 5**  
**Indik Warisan**  
**Paos 45**

1. Lwira sane wenang kawarisin :
  - ha. Hamong-amongan ring Desa, ayah-ayahan sahurah-arih
  - na. Hutang, piutang sang kawarisan.
  - ca. Saraja druwe, brana, tegal, carik, tatamiyan, sakancan kasugihan
2. Sane wenang ngawarisin :
  - ha. Manut lalintih paprenahan adoh tampek saking purusa tunggil siddhikara, tunggil dadya.
  - na. Putra dadaman wiyadin putra paperasan.
  - ca. Santana saking nuduk mantu.
  - ra. Sangkaning polih pitemes saking sang kawarisin sang madruwe salwir sane dados kawarisan kasaksinin antuk Guru Wisesa, pinih akeh apahtigaaan saking padruwen nane.
3. Sang sapasira hugi Krama Desa Adat Apit Yeh, tilar saking Agama Hindu, tan yogya ngawaris sane kamulan patut kawarisan.
4. Ngedum wawarisan kapatut sasampun puput maabenang sang ngawarisan brana punika. Sane dados dum, sajaba sane mangge padagingan pangaci-aci, minakadi salwiring sane mangge piranti ngalaksanayang upacara agama.

**SAPTAMAS SARGGAH**  
**WICARA LAN PAMIDANDHA**

**Palet 1**  
**Indik Wicara**  
**Paos 46**

1. Salwiring wicara indik krama Desa Adat, ring wawidangan Desa Adat Apit Yeh wenang rinawosan dening Prakanggen Desa Adat Apit Yeh. Yan tan kasiddhan puput, Prakanggen Desa ngaturang ring Guru Wisesa, buwat matatimbang.
2. Yan wenten wicara ring Pamaksan, ring Banjar Adat, ring Subak, ring Sekeha-sekeha sawosan, yogya kabawosan antuk prakanggennya sowang. Yan tan kasiddhan puput, wenang katengahang ka Desa, Prakanggen Desa yogya mamawosin.
3. Yan pamutus wicara sane katiwakang antuk Prakanggen Desa Adat Apit Yeh, tan kahiring tan katinutin antuk sang mawicara, wenang sang mawicara nunasang pangrawos ring sang patut mamawosin, inggih punika Guru Wisesa.
4. Yan sang mawicara taler tan tinut ring pamutus wicara sane katiwakang hinucap ring hajeng, prawiddha sang mawicara kabeledang saking Desa kantos puput wicaranya.

**Palet 2**  
**Indik Pamidandha**  
**Paos 47**

1. Lwiring pamidandha sane wenang katiwakang antuk Prakanggen Desa Adat Apit Yeh, Banjar Adat, Subak, Sekeha-sekeha sawawengkon Desa Adat Apit Yeh, sakadi ring sor puniki :
  - ha. Dandha artha.

- na. Dandha ayah-ayahan.
  - ca. Upasaksi, dewa saksi, pangrarata, sumpah.
  - ra. Dandha panyangaskara, lwire : mrayascita, marisuddha, miwah salwir ipun.
  - ka. Pamidandha sawosan manut palugrahan Guru Wisesa.
2. Patiwak pamidandha, manut unggwan wicarane swang-swang, lwire :
- ha. Yan wicara ring Desa Adat Apit Yeh, yogya kapidandha antuk Desa Dadandhan mantuk ka Desa.
  - na. Yan wicara ring Banjar Adat, katiwakin pamidandha ring banjar ika dadandhan mantuk ka Banjar.
  - ca. Yan wicarane ring Subak, minakadi ring sekeha-sekeha sawosan, yogya katiwakan dandha antuk sekeha punika, dadandhan mantuk ka sekeha inucap swang-swang.
3. Agung alit dadandhan, manut panglokikan agung alit kasisipane, sane mungguh ring awig-awig gagaduhan swang-swang, minakadi paswara/pararem pinaka pamutus pasamuhan.

### ASTAMAS SARGGAH NGUWAH-NGUWIHIN AWIG-AWIG

#### Paos 48

1. Sane wenang uwahin, inggih punika, pasukretan, paswaran pamutus parareman wiyadin pamutus pasamuhan miwah sane sawosan.
2. Indik nguwahin kalih nguwihin pasukretan, paswara, pamutus pararem wiyadin pamutus pasamuhan miwah sane sawosan, manut tata kramaning pasamuhan.
3. Indik nguwahin kalih nguwihin Awig-awig, manut tata kramaning pasamuhan, taler saking panugrahan Sang Amawa Bhumi.

### NAWAMAS SARGGAH PAMUPUT

#### Paos 49

1. Awig-awig puniki mawasta Awig-Awig Desa Adat Apit Yeh.
2. Awig-awig punika pinaka bantang sahananing Awig-Awig, pararem/paswara, pasukretan miwah salwir ipun, sane mangge ring swang-swang Banjar, Pura Kahyangan, Subak, Sekeha-sekeha sane wenten sajroning Desa Adat Apit Yeh.
3. Banjar, Pura Kahyangan, Subak, Sekeha-sekeha sane wenten sajroning Desa Adat Apit Yeh, wenang ngawangunang awig-awig, paswara/pararem, gagaduhan swang-swang, nanging daging ipun tan yogya tungkas ring Awig-awig Desa Adat Apit Yeh.
4. Salwiring sane durung mungguh ring Awig-awig puniki, kaungguhang sajroning pararem/paswara, pamutus pasamuhan Desa Adat Apit Yeh.
5. Dresta kuna sane kari dados anggen, yan tan tungkas ring daging Awig-awig Desa Adat Apit Yeh, manut kojaring ring sastra Agama Hindu, hanut ring uger-uger negara, saha kaputusan sajroning paruman Desa Adat Apit Yeh.
6. Awig-awig Desa Adat Apit Yeh puniki, kawangun Krama Desa Adat Apit Yeh, kapastika manut Upacara Agama Hindu kala dina :  
ring Pura Puseh Desa Adat Apit Yeh kapuput antuk Sulinggih.
7. Pinaka Saksi macaciren lingga tangan swang-swang
8. Awig-awig puniki kalaksanayang ngawit dina :



nama : ...

no. : ...

1. ...

...

...

...



...

...